

Ana Konwentin te Botaki ni Botannaomata iaon aia Riai Aomata aika iai kabwakan Bwain Rabwataia

Taekana ni Kiribati – te Beeba ni Kamatata Iaona

Te Berita ni Inanoi

Te Berita ni Inanoi e kauringia taian aba te naan boraraoi ibukin aia Riai Aomata n te aonnaba ake tabeua ao ni katerei bukin karaoan te Konwentin aei. Akea kanoana ibukin taian kabaebae nakoia taian aba ake a na karaoui; te naan kantaninga ibukia a bane n reke inanon kibun nako te Konwentin aei.

Kibu 1: Oina

Oin te Konwentin bon ibukin tarakiia aomata ake iai kabwakan bwain rabwataia bwa a na ebiebi ni karaoui aia riai n aomata, inaomataia ao karineaia n aekaia nako aomata.

‘Aomata aika iai kabwakan bwain rabwataia’ a nanonaki ke n reke iai aomata ake a teimaan n reke irouia kabwakan bwain rabwataia, aia iango, rabakauia ke uarereken aia konabwai ake a na kona n aki karaoui mwakuri ke te ibuobuoki nako n aia kaawa n aron are a karaoui aomata nako.

Kibu 2: Nanon Taian Taeka

Inanon te Konwentin aei:

- ‘Te Reitaki’ e nanonaki aekaki nako n reitaki n te taetae, te koroboki, koroboki ni kanikina, taekan taian koroboki, reta, taian man n reireiti, bwaana, kakaraki, wareware, taian rongorongon ao aekaki nako n reitaki aika boou man kukune ao rabakau n taai aikai ao ai reitaki n aekaia nako.
- ‘Taetae’ e kaineti ma taian taetae nako n te aonnaba, taetae ni kanikina ao ai aekaki nako n taetae ake aki kona n taekinaki ma a ti kona ni koreaki.
- ‘Taian Kakaokoroaki ni kaineti ma aomata aika iai kabwakan bwain rabwataia’ bon ngkana te aomata e katinanikuaki, totokoaki man karaoan ke e kakaokoroaki ibukina bwa te aomata anne ekabwaka bwain rabwatana, n te aro are e a totokoaki te aomata anne man karaoan mwakuri ao ni ebiebi ni karaoui ana riai nako ao inaomatana n aroia aomata nako. Aei are e reke naba iai te mwakuri n totoko nakoia aomata akanne te mwengaraoi.
- ‘Te mwengaraoi’ ae nanonaki ikai bon taian bitaki ke karoroko ake a kainnаноaki ni karaoaki n te aro are te aomata ae iai kabwakan bwain rabwatana, n taai tabetai ni karaoui ao ni kukurei ni karaoui ana riai n aomata ke inaomatana n aekan mwakuri ake a karaoui aomata nako. Te naan bitaki ke karoroko akanne aki kona ni matoatoa aron karaoia.
- ‘Banna aika Tabangaki’ e nanonaki iai taian banna aika karaoaki nakon taian bwai, taabo, burokuram ao taian tiweteti nako n te anga are e na kona te aomata ae iai kabwakan bwain rabwatana ni kabongana n akea manga kainnаноan bitakina. E ngae n anne ao bwaai ni ibuobuoki ke ni mwakuri ibukia aomata aika iai kabwakan bwain rabwataia n aekaia nako a riai ni karekeaki n te tai are a kainnаноia iai.

Kibu 3: Taian Kaetieti

Taian kaetieti ibukin te Konwentin aei bon:

- Karinean i bon irouia, inaomataia ao aroia i bon irouia;
- Kakean te kakaokoroaki;
- Karinaia n aia inanoi inanon te kaawa;
- Karineaia n aia kakaokoro ao butimwaeen aroia n aomata ni kaineti ma aomata ake iai kabwakan bwain rabwataia n aroia ao n anuaia n aomata;
- Katiteboakin karekean tibwangaia nako;
- Karoroko;
- Katiteboakia mwane ma aine;
- Karinean aia kona ataei aika iai kabwakan bwain rabwataia ao aia riai ni katematoai aroia.

Kibu 4: Taian Kantananga ni Kabaebae

A kantanangaaki taian aba bwa a na taraia bwa aomata aika iai kabwakan bwain rabwataia a ebiebi ni karaoi aia riai aomata nako ao inaomataia n akean te kakaokoroaki n aekaia nako ibukina bwa iai kabwakan bwain rabwataia.

Ni karaoan aei ao taian aba a boraai bwa:

- A na kabonganai taian riai n te Konwentin;
- A na kakeai ke ni biti taian tua, kainibaire ke aanga ni karaoi bwai ake a karekea te kakaokoroaki nakoia aomata aika iai kabwakan bwain rabwataia;
- A na taraia ao n rinanoi aia riai aomata aika iai kabwakan bwain rabwataia bwa a na wene inanon taian kainibaire ao burokuraem;
- A na taraia bwa taan mwakuri n te Tautaeka a mwakuri nakon kantananga akanne ake inanon te Konwentin;
- A na kakea te kakaokoroaki ibukin te kabwaka ni bwain rabwataia are riki nakon temanna ke te botaki teuana;
- A na karaoi ke ni karikirakea aron te kakae ao katamaroan bwaai, taian tiweti ao bwaai ni mwakuri ake a kona ni kabonganaki irouia aomata aika iai kabwakan bwain rabwataia, ao ni booia ae rangi ni materaoi;
- A na karekeaki angaa ni karoroko iaon taian rongorongoa iaon taian rabakau aika boou ake a na buokia aomata aika iai kabwakan bwain rabwataia, karekean buoka ao bwaai ni mwakuri;
- A na karikirakeaki taian kataneiai iaon aia riai aomata aika iai kabwakan bwain rabwataia ibukia aomata ake a mwakuri ma aomata aikai iai kabwakan bwain rabwataia;
- A na karaoi kanoan te Konwentin ake a tangira karaoan nanoia iaan tuan te aonnaba ao n tarai bwaai ake a tauraai, ni karaoi kanoan iteran nako te Konwentin ake a kaineti aia riai aomata ake a kaeti ma aron te maiu man kaubwain te aba, reitaki imarenaia ao katein abaia;
- A na taraia bwa aomata aika iai kabwakan bwain rabwataia, ni ikotaki ma ataei e na iai bwanaia ni kawaina iaan karaoan te Konwentin, rinanon taian botaki ake a tei ibukia.

Kibu 5: Te Katiteboaki ao Kakean te Kakaokoroaki

Taian aba a boraoui iaon are aomata nako a bane n ti tebo iaan te tua. A na taraia bwa aomata ake iai kabwakan bwain rabwataia a na katiteboaki aroia e ngae ngke iai kabwakan bwain rabwataia ao ni kamanoaki iaan te tua ni katiteboaki ma aomata nako.

Ni kakoauana bwa aomata aika iai kabwakan bwain rabwataia a na katiteboaki aroia ma aomata nako, taian aba a na karaoui mwaneka ni kakoaua bwa mwauku e reke irouia te raka ni ibuobuoki ke te bitaki ae na karaoaki nakoia bwa aonga ni mena n te karinan ae ti te arona ma aomata aika a toamau. Te raka ni ibuobuoki ke te bitaki anne e na karaoaki nanona n te aro ae aki matoatoa ke n rawawata.

Aomata aika toamau a na aki kona n tangitang bwa e a rangi n aki eti bwa aomata aika iai kabwakan bwain rabwataia a na anganaki te raka ni kuakua. Ma ngkana iai te aba ae iai ana tua ae okoro ke ana burokuraem ibukia aomata aika iai kabwakan bwain rabwataia are a katiteboaki iai aroia ma aomata nako, anne tiaki te kakaokoroaki.

Kibu 6: Aine aika iai Kabwakan Bwain Rabwataia

Taian aba a riai ni karaoui aia raka n tararua ni kakoaua bwa aine ma ataei aika aine aika iai kabwakan bwain rabwataia a riai n aki kaokoroaki aroia ibukina bwa aine ngaia ke ibukina bwa iai kabwakan bwain rabwataia. Taian aba a riai ni karaoui mwaneka ni kakoaua bwa aine ao ataei aika aine aika iaia kabwakan bwain rabwataia a riai n ti tebo n aia riai n aomata ao inaomataia n aekaia aomata nako.

Taian aba a na karaoui mwaneka ake a na taraia bwa aine aika iai kabwakan bwain rabwataia a na ebiebi ni karaoui aia riai n aomata ao inaomataia ake a taekinaki n te Konwentin aei.

Kibu 7: Ataei aika iai Kabwakan Bwain Rabwataia

Taian aba a na karaoui mwaneka n taraia bwa ataei aika iai kabwakan bwain rabwataia a riai n ti tebo n aia riai n aomata ao inaomataia n aekaia ataei nako.

Ni karaoan taian babaire ibukia ataei aika iai kabwakan bwain rabwataia, te bwai ae riai ni taraaki bwa tera ae te kabanea n tamaroa ibukin te ataei.

Taian aba a na kakoaua bwa ataei aika iai kabwakan bwain rabwataia, ni katiteboaki ma ataei nako:

- A na iai aia riai n taetae n aron te bwai are a iangoia ni baike a na roti aroia;
- A na karekei buokaia n taetae iaon baike a iangoi ni kaeti ma aia ririki ni maiu ao aroia ni mwauku; ao
- A na taraaki kanoan baike a iangoi are boboto iaon aia ririki ni maiu ao tauia.

Kibu 8: Karikirakean Ataakina

Taian aba a na karaoui mwakuri n te tai ae waekoa ni kaitaraai waaki aika a na kamemerea aron ataakin aia itera aomata aika iai kabwakan rabwataia ao n tuangiia aomata bwa aomata aika iai kabwakan rabwataia iai aia riai n aomata ao tera ae a kona ni karaoia aomata akanne.

Bwaai aika a riai ni karaoi taian aba bwa e aonga ni koro nanon baike a taekinaki ieta:

- Wakinan taian anainano n kakatanoana nakoia te botannaomata;
- Kabonganaan te botaki n reirei bwa a na reireinia aomata karineaia mwauku;
- Kaungan te naan botaki ni kanako bwana ao kareke rongorongo bwa a na katerei baike a kona ni karaoi mwauku; ao ai
- Karikirakean te kataneai ibukin aroia mwauku.

Kibu 9: Te Karoroko

Aomata aika iai kabwakan bwain rabwataia bon iai aia riai ni maiu ni inaomata ao ni karaoi itera nako n te maiu aei.

Ni kakoauana bwa aomata aika iai kabwakan bwain rabwataia a na karaoi baikanne, a kantaningaki taian aba bwa a na karaoi mwaneka n angania aomata aika iai kabwakan bwain rabwataia n aroia aomata nako te kona n kawari ke n rokoroko ni bwaai nako, taabo nako, baao ni mwamwananga nako, rongorongo ao tiweti ake a kaukaki nakon te botannaomata. Aei are e riai ni bwainaki n te taaun ao i buki.

Ni karaoan aei ao taian aba a riai:

- Ni kakaea bwa tera bukin kangangan aki rokorokoia aomata aika iai kabwakan bwain rabwataia ni baike a kona n roko iai n aia kaawa ao ni karaoi angaa ni kakeai kanganga akanne;
- N taraia bwa aomata aika iai kabwakan bwain rabwataia a na ti tebo aroia ma aomata nako ni karokoia n taabo ni maeka ke auti nako, taian kawai, bao ni mwamwananga ao ana bwai te botannaomata n aron taian reirei, auti ni maeka, on-aoraki, kiriniki ao ai taabo ni mwakuri nako; ao
- N kakoaua bwa aomata aika iai kabwakan bwain rabwataia a na ti tebo aroia ma aomata nako ni kawari ke n rokoroko n rongorongo, aanga n reitaki ao ai taian tiweti nako n aron te naan taabo ni intaneti ao taabo n aron te onnaoraki ao te tabo ni bureitiman.

Taian Aba a karaoi naba mwaneka n aron:

- Katean kakairi ao katoto ibukin karokoia n taabo nako ao tiweti nako ake a kaukaki nakon te botannaomata;
- Kakoauana bwa taian bitineti ake a bwaibwai iai aomata ake a karekei bwaai nako ao tiweti nako nakoia te botannaomata a riai n taraia naba aomata aika iai kabwakan bwain rabwataia;
- Karekean te kataneiai nakoia aomata nako ibukin karokoia aomata aika iai kabwakan bwain rabwataia n taabo nako;
- Kabonganaan taian kanikina ake a bureire (Braille) ao ni kai warekaki ao n oota te aba iai n taian kateitei nako ao taabo nako ake a kaukaki nakon te botannaomata;
- Karekean temanna are na ibuobuoki inanon taian kateitei ma auti nako ibukia te botannaomata n aroia taian kaaiti, taan wareware ao taan rabakau ake a kona n raira te taetae teuana ma teuana;

- Karikirakean angaa riki ni ibuobuoki nakoia aomata aika iai kabwakan bwain rabwataia bwa aonga ni kona n roko n taian rongorong nako;
- Karikirakean angaa ni karoroko nakoia aomata aika iai kabwakan bwain rabwataia bwa a na kona n rokoroko n rongorong ma anga n reitaki aika boou n aron te intaneti; ao
- Karekeaia naake a karaoi rongorong ao angaa n reitaki aika boou ni kona n taraia aomata aika iai kabwakan bwain rabwataia bwa a na kabonganai aekaki ni bwaai akanne n te boo ae materaai.

Kibu 10: Te Riai ni Maiu

Taian aba a riai ni kakoaua bwa aomata aika iai kabwakan bwain rabwataia a na ebiebi n aia Riai n Aomata n aekaia aomata nako.

Kibu 11: Taai ni Kanganga ao Ni Kabuanibwai

Taia aba a riai ni karaoi aanga ni kakoaua bwa aomata aika iai kabwakan bwain rabwataia a na kamanoaki raoi ao ni katanaki man taian kabuanibwai ao kanganga n aron te urarake, te iekaki ao ai kanganga nako ake a kona n rota maiun temanna n aron te buaka ao ai aekaki nako ni kabuanibwai.

Kibu 12: Katiteboakin kinakiia iaan te Tua

Taian aba a boraai bwa aomata aika iai kabwakan bwain rabwataia iai aia riai ni katiteboaki ma aomata nako iaan te tua are a bon kona ni karaoi aia babaire nako aika bwai iaan te tua. Bon aomata aika a kona ni bwaibwai ao ni karekei aia bwai, ni babairea aron aia mwane ao aia karekemwane ao kabanemwane ao ni kona n tangomwane, ni karekei ke n tauaki aia bwai ibukin aia tangomwane, ao n tarau n aroia aomata nako. Aia bwai aki kona n anaaki mairouia n akea bukina ae riai ke n aki eti iaan te tua.

Tabeman aomata aika iai kabwakan bwain rabwataia a kainnanao buokaia ni karaoi aia babaire. Taian aba a riai ngkanne ni karaoi aanga ni kakoaua bwa mwakuri ake a kainnanao aei a na anganaki buokaia ni karaoi aia babaire ni kaineti ma aroia ni maiu iaan te tua ao maiua ni karekemwane ao ni kabanemwane.

Taian aba a na kakoaua bwa:

- Aomata ake a boutokaia a na karinea aia riai, aia rinerine, ao aroia nako aomata aika iai kabwakan bwain rabwataia;
- Aomata ake a boutokaia a na aki reke n te aro n totoko ibukin te irekereke;
- Aomata ake a boutokaia a na aki kairoroa ke ni karawawata te aomata ae iai kabwakan bwain rabwatana ni karaoan ana babaire;
- Te aomata ae iai kabwakan bwain rabwatana e na anganaki ti te ibuobuoki are a bon kainnanaoia ao n ti te tai are a kainnanaoia iai;
- Te ibuobuoki are a anganaki aomata aika iai kabwakan bwain rabwataia e na rinanoaki iroun te Bowi ke rabwata riki tabeua bwa e na taraaki bwa e aki tabeitera; ao
- Aanga ni ibuobuoki ni kamaiu e na ti te tikina ma aekaki ni kuakua n aia Riai nako.

Kibu 13: Kawarakin te Kabowi

Taian aba a na kakooua bwa aomata aika iai kabwakan bwain rabwataia ti tebo aia Riai ma aomata nako n aroia ni kawari taabo ni kabowi.

Ngkana e kainnanoaki, ao a kantaningaki taian aba bwa a na bitii kawai ni karaoan bwaai tabeua n te aro are aomata aika iai kabwakan bwain rabwataia a na kona n ira buakon te waaki n aron nako kawain nako te kabowi. A na karikirakea aron te kataneiai nakoia aomata ake a mwakuri n taabo ni kabowi n aroia taan moti n te Bowi are Rietata, taan moti n te bowi are inano, bureitiman ao taan mwakuri n te karabuuti.

Kibu 14: Te Nanoanga ao Kamanoan Te Aomata

Aomata aika iai kabwakan bwain rabwataia iai aia Riai ae ti tebo ma aomata nako ni kaineti ma nanoangakiiia ao kamanoakia. Taian aba a na kakooua bwa a na aki kaburabutinaki ke n tauaki n tabo nako, ni karokoa e bon eti iaan te tua bwa e riai ni karaoaki anne ao ni kakoouaki bwa bon iai bukina ae riai. Akea ae riai ni karabutinaki ke n tauaki n taabo tabeua ti ibukina bwa iai kabwakan bwain rabwatana.

Ngkana a karabutinaki ke n tauaki n taabo tabeua aomata aika iai kabwakan bwain rabwataia, aia Riai n Aomata, ni ikotaki ma aia Riai ni kabane inanon te Konwentin aei, e riai n aki anaaki mairouia.

Te tua are katereaki iai taian Riai a riai ni kabonganaki naba nakoia aomata aika iai kabwakan bwain rabwataia n ti te arona ma ake a kabonganaki nakoia aomata nako. Ma e riai ni karaoaki te bitaki nakon kawai ni karaoan bwaai ke taabo ake a kawakinaki iai aomata aika iai kabwakan bwain rabwataia n te aro bwa a na mwannanoaki kabwakan bwain rabwataia ao ni kamanoaki aia Riai iaan te Konwentin aei.

Kibu 15: Kainaomatakiia man te iowawa, te aki ako ao kammarakaia ke katuaeakakia

Taian aba a riai n taraia bwa akea ae na riai ni bwainikirinaki ke ni kammarakaki n te aro n aki ako ke n angaa nako ni iowawa.

E a moamoa riki, bwa taian aba a riai ni karaoi mwaneka n aron karaoan tuua ke kaetieti, n taraia bwa aomata aika iai kabwakan bwain rabwataia a riai n aki taumatoaki bwa a na ira buakon te kakatai iaon bwainnaoraki ke rabakau aika boou.

Kibu 16: Kainaomatakiia man te kabonganaki buaka, te bwainikirinaki ao bakataeaki

Taian aba a riai n karaoi baikai:

- kamanoaia aomata aika iai kabwakan bwain rabwataia (inanon ao i tinanikun mwengaia) man taian bwainikirinaki n aekaia nako ao bakataeakiiia ao bon mairouia aomata ake a kabonganaiia n te aro ae aki riai;
- karekean te buoka ao boutokaia aomata aika iai kabwakan bwain rabwataia ma aia utu ao taan kawakinia ni ikotaki ma reireinakiia bwa a na atai anga n totokoi, kinakin ao ribotinaki taian bwainikirinaki ao aomata ake a rangi ni kabonganaia aomata aika iai kabwakan bwain rabwataia n te aro ae aki riai;

- tarakin taian waaki ke tieweti n totoko bwa a na mwannanoa ana ririki ni maiu te aomata, tera ngaia te mwane ke te aine ao ai taraana bwa iai kabwakan bwain rabwatana;
- kakoauakin taian anga ke bwai ao burokuram ibukia aomata aika iai kabwakan bwain rabwataia bwa a tararuaki man botaki nako bwa a na akea te nanonano irouia;
- buokakia aomata aika iai kabwakan bwain rabwataia ake a tia ni kabonganaki n te aro ae aki riai ke n bakataeaki bwa a na manga okiri aroia mai mwaina inanon maekaia n te kaawa; ao ai
- karaoan taian tua ma kainibaire (ni ikotaki ma naake a boboto iaoia aine ma ataei) n taraia ni kakoaua bwa te naan bwainikirinaki ao bakataeaki nakoia aomata aika iai kabwakan bwain rabwataia, a na kai kuneaki, ni karaoaki te kakae iaoia ao ni kateaki n te bowi ni kaburebure.

Kibu 17: Kamanoaia n Anuaia n Aomata

Aomata aika iai kabwakan bwain rabwataia iai aia Riai ae ti tebo ma aomata nako ni karineaki n anuaia ke n rikia ae aomata ngaia.

Kibu 18: Te Nanoanga ibukin Mwamwanangaia ao Rikia bwa Kain te Aba

Taian aba a boraoi bwa aomata ake iai kabwakan bwain rabwataia a inaomata ni mwaing, n rinei taabo ake a kan maeka iai ao n riki bwa kain te aba teuana, n ai aroia aomata nako.

Taian aba a na taraia ni kakoaua bwa, aomata ake iai kabwakan rabwataia, n ti te arona ma aomata nako:

- iai aia Riai ni karekea ao ni bita abaia;
- a kona ni roko n te naan tieweti ao beeba ibukin karekean ao bitakin abaia are a tangiria, n aron te naan bwatiboti ke aekaki ni booma riki tabeua ibukin kinakiia;
- a inaomata ni kitana te aba teuana ma teuana (ni ikotaki ma are oin abaia), ao
- a kona ni manga okiri oin abaia.

Ataei ake iai kabwakan bwain rabwataia a na tauaki mwin aia bong ni bung ngkana a bungiaiki. Iai aia riai ibukin araia, abaia ao ni kinaia ao n tabeakinaki irouia aia karo.

Kibu 19: Te Maeka ni inaomata ao n riki bwa kain te kaawa

Aomata ake iai kabwakan bwain rabwataia iai aia riai ae ti tebo ma aomata nako ni maeka, ao ni ira buakon te waaki ao n riki bwa kain te kamronron ke te kaawa.

Taian aba a riai ni karaoi mwaneka ni buokia aomata ake iai kabwakan bwain rabwataia bwa a na ebiebi n aia riai ike a na kakoaua raoi bwa aomata ake iai kabwakan bwain rabwataia a na:

- iai aia riai n rinea te tabo are a kan maeka iai ao antai ae a tangiria ni maeka ma ngaia n aekaia aomata nako;

- n roko n tabo n aron inanon mwenga, tabo ni maeka ao tabo riki tabeua ake a bwai te kaawa ibukin te ibuobuoki, ni buokia bwa a ira buakon te waaki ao n totokoaki itera ake a na kona ni karika tionakoia man ana waaki te kaawa.
- e na boraai aron kawaran taabo ma bwaai ake bwain te kaawa ake a katauraoki ibukia te botannaomata, are riai n tarai kainnanoia aomata ake iai kabwakan bwain rabwataia.

Kibu 20: Te Mwamwaewe i bon irouia

Taian aba a na taraia ni kakoaua bwa aomata ake iai kabwakan bwain rabwataia a na kona ni mwamwae nakon tabo nako ao n anganaki te kainaomataaki i bon irouia.

Aikai tabeua kawai ibukin karaolan aei:

- kangaraoana irouia aomata aika iai kabwakan rabwataia bwa e na bebete aron mwamwaeweia n te aro are a tangiria, ao n te boo ae a kona ni karekea,
- buokaia aomata aika iai kabwakan rabwataia ni kona n reke irouia buokaia man taian bwai ni mwamwananga ke n nakonako, rabakau ao aomata ake a na buokia, n te boo ae a kona ni karekea,
- karekean te kataneiai ni kabonganaan bwaai n mwamwananga nakoia aomata aika iai kabwakan rabwataia ao naake a mwakuri ma ngaiia, ao
- kaungaia aomata ake a karaoi bwai n nakonako ao rabakau aika boou n tarai aekaki ni bwai n nakonako n aekaia nako.

Kibu 12: Inaomataia n taetae ao ni karaoi oin aia iango ao n roko n te naan rongorong

Taian aba a wakin mwaneka n taraia ni kakoaua bwa aomata ake iai kabwakan rabwataia iai aia Riai n taekin baike a iango ao ni buoka ni iango n aroia aomata nako. Aei are e nanonaki naba iai te inaomata n titiraki, ni karekei ao n tibwa te rongorong ao iango rinanon taetae, Braille, man koroboki ao aekaki nako n reitaki.

Aikai tabeua mwaneka ake a riai taian aba ni karaoi:

- katauraolan taian rongorong ibukin te botannaomata n aekaki nako ni koroboki (n aron Braille ke ake n te kombuta) n te tai ao n te boo ae aki raka;
- kariaiakaia aomata ake iai kabwakan rabwataia ni kabongana te bureire, taetae ake iai korobokiaia ao ai aekaki n reitaki nako ngkana a reitaki ma ana itabon te Tautaeka,
- kairoroaia bitineti ake a bwaibwai iai aomata bwa a na karekei tiweti nakoia te botannaomata, ni ikotaki ma te intanete, ni karekei rongorong ao tiweti n angaa aika aika kai roko iai aomata aika iai kabwakan rabwataia,
- kaungaaia botaki ni kareke ao kanako rongorong ma rerio ao ni intanete ni karaoi aia tiweti aika kai roko iai aomata aika iai kabwakan rabwataia,
- butimwae an ao karikirakean kabonganaan te naan taetae aika iai korobokiaia.

Kibu 22: Karinean Aroaron maiuna ae raba

Aroaron maiua ae raba aomata aika iai kabwakan bwain rabwataia a riai n aki waewaeaki n akea bukina ke n aanga aika a ritinanikun te tua. Karineaia ao

kamoamoia aomata aika iai kabwakan rabwataia aki riai n ekakinako ake a ritinanikun te tua. Te tua e riai ni kamanoia aomata aika iai kabwakan rabwataia man te waewaeaki ao ekakinakoia.

Taian aba a riai ni kamanoi rongorongoa n tatabemania nako ao rongorongon aorakia ao rongorongon aia bwain aoraki aomata aika iai kabwakan bwain rabwataia n ai aron kamanoan rongorongoa aomata nako.

Kibu 23: Karinean Te Mwenga ao te Utu

Taian aba a riai ni karaoi taian mwaneka n taraia ni kakooua bwa aomata aika iai kabwakan bwain rabwataia n aekaia aomata nako are ni kaineti ma te mare, te utu, te natinati ao taian irekereke nako, a na:

- inaomata ni mare ke ni iein ao ni katei utu,
- inaomata n bairei mwaitia natia ao n taai ake a na karikia natia iai,
- kona n reireinia ni karekei natia ao ni babairea aia utu; ao
- ni kateimatoa aia man ni kariki n aroia aomata nako.

Aomata aika iai kabwakan bwain rabwataia iai aia riai ao mwiokoia ni kaineti ma te tabetabe ke te tobwa, ke n riki bwa karo aika a tabeka natia ke n riki bwa taan kawakinia ataei n ai aroia aomata nako iaan te tua. Te kabanea ni kakawaki ni bwai bwa tera ae rangi n tamaroa ibukin te ataei. Aomata aikai iai kabwakan bwain rabwataia a riai ni buokaki ni kaikawaia natia n taabo ao n taai ake a tangiria iai.

Ataei aika iai kabwakan bwain rabwataia iai aia riai ae ti te arona ma ataei nako n aroia ke maiuia n aia utu. Taian aba a riai ni katauraoi rongorongo, tiweteti and boutoka nakoia ataei aika iai kabwakan bwain rabwataia ma aia utu.

Te ataei e aki riai n anaki mairouia ana karo ni kaitara are bon oin nanona ma ti ngkana e baireia te bowi n taraan te kabanea n tamaroa ibukin te ataei anne. (Te moti e riai n aki boboto iaon taekan te ataei ke te karo anne bwa iai kabwakan bwain rabwatana.) Ngkana te utu ae e a aki kona n tararua natina ae iai kabwakan bwain rabwatana, a kona ana koraki (n aron ai tinaia, ai tamaia ke tibuia) n tuangaki bwa a na kawakina te ataei anne. Ma ngkana e angabuaka, ao e kona te ataei anne ni kawakinaki irouia te utu teuana ngkana e angaraoi.

Kibu 24: Te Reirei

Aomata aika iai kabwakan bwain rabwataia ti tebo aia riai ma aomata nako ibukin te reirei. Taian aba a riai n taraia ni kakooua bwa aia botaki n reirei ke aia waaki n angareirei e na mwannanoia naba, ao e na karikirakei naba aia konabwai aomata aika ia kabwakan bwain rabwataia.

Ni karaoan aei, ao taian aba a na taraia bwa:

- ataei aika iai kabwakan bwain rabwataia a riai n reirei ni moanrinan ao ni kauarinan n aroia ataei nako,
- taian reirei nako a karaoi taian bitaki ni mwannanoia ke ni kamwengaraoia ataei aika iai kabwakan bwain rabwataia; ao

- aomata aika iai kabwakan bwain rabwataia a na boutokaki n aron te waaki n reirei, ke
- aomata aika iai kabwakan bwain rabwataia a na kona n roko n raka ni buoka n taian reirei ake a boboto iaon rabakau aika kakaokoro, ni buokia ni karekea te rabakau ao n reireinia rabakau aika kakaokoro.

Taian aba a riai ni buokia aomata aika iai kabwakan bwain rabwataia n reireinia aron te maiu ma rabakau n te mwenga. Aei are e reke naba iai karaoan mwaneka ni:

- kabebetei aia waaki aomata aika iai kabwakan rabwataia n reirei waaki n reitaki nako, n aron taetae ni kanikina ao Bureire, ao rabakau ake a na buokia ni kona n nakonako ke ni mwamwainging;
- karekeaia aomata ake a na boutokaia ao n reireinia; ao
- taraia bwa ataein te reirei aika mataki, a bonotaninga ke ni uaia ni bonotaninga ao ni mataki a na reireinaki n te aro n reitaki ae a kai oota iai.

Taian aba a karaoi mwaneka n tangoia taan reirei ni ikotaki ma taan reirei aika iai kabwakan rabwataia, ake a beeba n te taetae ni kanikina ao ke Bureire, ao ni kataneiaia tan mwakuri n te Botaki n Reirei ibukin aanga n reireinia ao ni boutokaia aomata aika iai kabwakan bwain rabwataia.

Aomata aika iai kabwakan bwain rabwataia iai aia riai ae ti te arona ma aomata nako n roko ni katenrinan n reirei, reirei ibukin bwain te mwenga ao arona nako, reirei ibukia ikawai ao taian kooti nako n akean te kakaokoroaki. Taian aba a riai ni kakooua bwa e na iai te bitaki tabeua aika karaoaki irouia taabo n reirei nako ke taabo ke tienta ni kataneiaia nako ni buokia aomata aika iai kabwakan rabwataia n roko n aekaki n reirei aikai.

Kibu 25: Marurungin Rabwataia

Taian aba a boraai bwa aomata aika iai kabwakan rabwataia iai aia riai ae ti te arona ma aomata nako bwa a na marurung n akean te kakaokoroaki ibukina bwa iai kabwakan rabwataia. Nanona bwa bon karaoan mwaneka ni:

- katauraioia aomata aika iai kabwakan rabwataia ma bwai n aoraki aika ti te arona aika aki kaboaki ao a boraai, ni ikotaki ma reirei ibukin te maiu n taanga, on-aoraki ke tararua ibukia ataei ao taabo n tutuo ibukia te botannaomata;
- karekean tiweti ibukin taabo n tutuo ao on-aoraki are ti kaineti ma aomata ake iai kabwakan bwain rabwataia ni ikotaki ma tiweti nako ibukin moan rokon te aoraki ao ni kataia n totokoa reken riki kabwakan bwain te rabwata;
- kangaraoan taian kiriniki ao onaoraki aikai ni uakan ma aia tabo ni maeka aomata ni ikotaki ma naake i buki;
- karaoia taokita ma taan mwakuri n on-aoraki ma kiriniki bwa a na anga te bwain aoraki ao te kuakua nakoia aomata aika iai kabwakan bwain rabwataia, ae ti te arona ma aomata nako ni ikotaki ma bwain aorakiaia tii n taai ake a kariaia iai ao n te tai are e a tia n tuangaki iai te aomata bwa tera bwaai ake a kariaia nako iai, ni kakooua bwa taokita ma taan mwakuri n te on-aoraki ke

taabo ni kuakua ata aia riai aomata aika iai kabwakan rabwataia ao bwa a na katei kaetieti ni babaire ibukin te aro n tararua ao ni kuakua;

- katabua te kakaokoroaki ni kaineti ma te bwain aoraki ke ni kuakua ao te kabomwi ni maiu, are e na katauraokaki n te aro ae boraai ao n angaraai; ao
- katokia aomata man kakaokoroakiia aomata aika iai kabwakan bwain rabwataia ngkana a karekei bwain aoraki, amwarake ke moo.

Kibu 26: Te Bobotaki ni Inanoi ao te Boutoka riki Ni Kaungaia Aomata ni Maiua

Taian aba a karaai mwaneka ni buokia aomata aika iai kabwakan rabwataia bwa a na riki ni inaomata, ni mena inanon aia kabanea n marurung n rabwataia, n aia iango ao n aia inanoi ao n aia mwakuri, ao ni kairaki ibuakon waakin nako te maiu aei. A karaoa aei rinanon katean and kamarurungan waaki ma kanoan n aia bobotaki ni inanoi e moamoa riki n aia kuakua, kammwakuri, reirei ao ai waakin nako te maiu aei.

Te naan tiweti ma kanoan aia waaki a riai:

- ni moanaki ni moantaai;
- a boboto iaon kainnanon ao korakoran temanna ma temanna;
- buokaia aomata aika iai kabwakan rabwataia bwa a na kaina ao ni ira buakon te waaki;
- a na tatauraai n taai nako ni kaniia aia kaawa aomata (ni ikotaki ma ake i buki ke aonnaba)
- a na karaoa te mwakuri n anganano.

Taian aba a kaungaaki naba bwa:

- a na kateimatoai aia kataneai ibukia taan mwakuri n taabo ake a waakiniki tiweti ni inanoi ao ni bobotaki ni kaungaia aomata ni maiua;
- a na kabonganai bwaai ni ibuobuoki ao rabakau aika boou ake a karaoaki ibukia aomata aika iai kabwakan rabwataia ni kaineti ma kateiraoaia inanon aia bobotaki ni inanoi ao ni waaki inanon maiuia aei.

Kibu 27: Te Mwakuri ao te Kammwakuraki ni Kaboaki

Taian aba a boraai bwa aomata aika iai kabwakan rabwataia iai aia riai n aroia aomata nako ni mwakuri. Taian aba a karaai mwaneka n taraia bwa aomata aika iai kabwakan rabwataia a kabongana aia riai aei, ni ikotaki ma:

- katabuakan te kakaokoroaki ae bure iaan te tua nakoia aomata aika iai kabwakan rabwataia n taabo ni mwakuri, ni ikotaki ma karekean aia mwakuri, karekean karikirakeaia n aia mwakuri ao karekean tuan aia mwakuri ibukin kamanoaia ao n taabo aika aki kaaoraki;
- tarakia aomata aika iai kabwakan rabwataia bwa e na iai tuan aia mwakuri ae nakoraai, n aron te katiteboaki n te waaki inanon te mwakuri, te boo ae ti te tikina ibukin karaon te mwakuri ae ti tebo, kamanoaia man taian tangakoaki ao kawai ibukin rinanoan taian tangitang;
- tarakiia bwa aomata aika iai kabwakan rabwataia a na inaomata ni iri taian botaki ni iunion n aroia aomata nako,

- kaungakin karekean mwaawa n te mwakuri, taabo ni kataneiai, karekean kataneiai, katamaroan nakoia ao wakinan aia bitineti ibon irouia aomata aika iai kabwakan rabwataia,
- tangoakia aomata aika iai kabwakan rabwataia iroun te Tautaeka ao kaungaakia bitineti ake a bwaibwai iai aomata bwa a na tangoia aomata aika iai kabwakan rabwataia; ao
- kamanoaia aomata aika iai kabwakan rabwataia man te kamwakuri ae taumatoa, n aron kamanoaia aomata nako.

Kibu 28: Te Maiu ae Tau ao Kamanoaia man taian Aroaro

Taian aba a boraio bwa aomata aika iai kabwakan rabwataia ma aia utu iai aia riai ni karekean tein aroia ae tau ibon ibukiia, ni ikotaki ma kanaia, aia kunikai ao aia auti. A na kakoaua bwa bwaai aikai a bane n tatauraio n taai nako n akean te kakaokoroaki ti ibukina bwa iai kabwakan bwain rabwatana.

Taian aba a boraio bwa aomata aika iai kabwakan bwain rabwataia iai naba aia riai ni kamanoaki man aia waaki nako inanon aroaroia ni maiu. Taian aba a na karaio mwaneka n angania aomata aika iai kabwakan bwain rabwataia bwa a na roko nakon tiweti ao bwai nako ibukiia aomata aika iai kabwakan bwain rabwataia, ao te kona n reke te ran ae itiaki nakoia, kanoan waaki ake a na buokia n totokoa te maiu ni kainnana, auti ibukin te botannaomata ao te bentin, n ti te arona ma aomata nako.

Kibu 29: Te Ira buakon te Waaki n Tautaeka ao n Maiun Te Botannaomata

Taian aba a na taraia bwa aomata ake iai kabwakan bwain rabwataia a na ira buakon te waaki n tautaeka ao ni maiun te botannaomata n ai aroia aomata nako ni ikotaki ma te riai n rinerine ao ao te kan rineaki ao te rineaki.

Aei are e ikotaki ma:

- tarakin te waaki ni kaotinano n tain te rinerine bwa a na roko iai ao te waaki anne e na bebeta aron kabonganana ao ni kai oota irouia;
- kamanoaia n rinerine n te kaotinano ae raba;
- kariaiakaia aomata aika iai kabwakan rabwataia n anga araia ni kan rineaki ao n rineaki n ai aroia aomata nako; ao
- kangaraoaia aomata aika iai kabwakan rabwataia bwa a na reke buokaia n te rinerine ngkana a kainnanaoia mairouia aomata ake a bon rinea.

Taian aba a na karikirakea te waaki ni kaungaia aomata ake iai kabwakan bwain rabwataia ni ira buakon te waaki, ni ikotaki ma kainakin botaki ake akea irekerekeia ma te tautaeka, taian bwatei n te auti ni maungatabu ao kurubu ake a tei ibukia aomata aika iai kabwakan rabwataia.

Kibu 30: Te Ira buakon te waaki ni katein te aba, kakibotu, kakukurei ao takakaro

Aomata ake iai kabwakan rabwataia iai aia riai ni karaio ao ni ira buakon te maiu man katein te aba n ai aroia aomata nako.

Taian aba a na karaoi mwaneka ni kakoaua bwa aomata ake iai kabwakan rabwataia a kona n roko ke ni karekei:

- bwaain nako te aba ke te katei, n aron taian boki ao baikara riki ake a kaineti ma booki ni karaki;
- taian burokuraem iaon te tv, birim ao taabo ni kaotioti ke kamataku;
- taabo ibukin kamataku ao tieweti iaon taian katein te aba, n aron taabo ni kaotioti ke kamataku, te umwa ni bong, taabo n tamnei, taabo n tangoboki ao ai tieweti iaon te kaneweaba; ao ai
- taabo ake a kawakinaki iai bwain ke katein te aba (n aron bangota) ake a rangi ni kakawaki nakon te aba anne.

Taian aba a na karaoi mwaneka are aomata aika iai kabwakan bwain rabwataia ni karikirakea ao ni kabongana aia tarena ke rabakauia ni korobanna ke aia kona ni kario tiaki ti bon ibukia ma ibukin naba te botannaomata.

Taian aba a na karaoi mwaneka ni kakoaua bwa tuua ni kamanoi aia iango, koroboki, korotamnei ke kario bwa a na aki katotoaki, aki kakaokoroaki iai aomata aika iai kabwakan rabwataia ake a kataia ni kabonganai bwaai n aia katei n aekaia nako ni karaoi aekaki akanne.

Aomata aika iai kabwakan rabwataia a riai, n ai aroia aomata nako, ni kinaki ni bon oin aia katei ao aia taetate, ni ikotaki ma taetae ni kanikina ao kateia ni kaineti ma te aro ni bonotaninga.

Taian aba a na karaoi mwaneka ni:

- kaungaaia aomata aika iai kabwakan rabwataia bwa a na ira buakon te takakaro ma aomata aika akea kabwakan rabwataia;
- kakoaua bwa aomata aika iai kabwakan rabwataia a kona n roko n taian tabo ma tieweti nako ibukin te takakaro, kakukurei ao kaneweaba; ao
- kakoaua bwa aomata aika iai kabwakan rabwataia a kona n bairei, karikirakea ao ni ira buakon te takakaro ao taian kakukurei ake a kateaki ibukia aomata ake iai kabwakan rabwataia.

Ataei aika iai kabwakan rabwataia a kona n takakaro, kakibotu, kakukurei, ao n ira buakon te kabo n takakaro n ai aroia ataei nako.

Kibu 31: Te Anai ao n Rikoi Beeba ibukin tauan mwin bwaai ma rongorong

Taian aba a boraai n anai ao n rikoi ke ni boboti rongorong bwa:

- e na buoka mwakurian te Konwentin aei;
- e na buoka taran te Konwentin aei bwa e uara aron mwakuriana;
- e na kakae ao ni katoki kanganga ake a katibo ma ngaia aomata aika iai kabwakan rabwataia ni karaolan nako aia riai.

Te naan rongorong a na riai ni rikoaki ke n anaaki ao ni kawakinaki n te aro ke n te anga are e na karinea aron kakawakin aki kaokaotan ma kawakinan aroia maiuia ae

raba aomata aika iai kabwakan bwain rabwataia ao ni booraoi ma katein aroaro aika bwainaki n te aonnaba.

Beeba n tauan mwin bwaai ma rongorongo akanne a riai naba ni kona n roko iai aomata aika iai kabwakan bwain rabwataia.

Kibu 32: Te Reitaki ni Ibuobuoki n te Aonnaba

Taian aba a boraai bwa e rangi ni kakawaki te mwakuri ni inanoi ke ni bobotaki ni kakoua bwa te Konwentin aei e na mwakuriaki n taian aba nako. A na karaai mwaneka ni karaoa nanon aei ni:

- kakoaua bwa burokuraem ni karikirake ke kanoan waaki ni karikirake n te aonnaba ao te reitaki ni ibuobuoki n te aonnaba a reke naba iai aomata aika iai kabwakan rabwataia ao ni kona n roko naba ni waaki akanne;
- ibuobuoki i bon irouia, ni ikotaki ma tibwaan rongorongo, mwaatai, kataneiai ao aron mwakuriaia aika tamaroa;
- ibuobuoki imarenaia n aia kakae rongorongo ao n roko n taian rongorongo man rabakau ao kukune aika boou; ao
- katauraoa, n angaraoina, taian ibuobuoki n te mwane ao mairouia taan rabakau, n aron te ibuoka ni bwai iaon rabakau ma kukune aika boou ake a na buokia aomata aika iai kabwakan rabwataia.

Kibu 33: Te Tararua ao Kakoroan Nanona iroun te Aba Teuana ma Teuana

Taian aba a rinea teuana ke e raka riki ana kanoa te Tautaeka ake a tabe ma itera nako ake a taraia bwa e kanga ni mwakuriaki te Konwentin aei. A na rinanoi katean ao rinean ana botaki teuana te Tautaeka are e na buoka aron kabutan raoi waaki ngkana e mwakuriaki te Konwentin aei.

Taian aba a na katei waaki ke kawai are e na taraia bwa e na kakoauaki raoi bwa te Konwentin aei e mwakuriaki. Te waaki anne e na inaomata, ao n taraa te kawai ke te anga ae mwakuri are kabonganaki irouia botaki ake a tabe ma aia riai aomata ake a kateaki n te aba anne. Aomata nako n te kaawa anne, e a moamoa riki aomata aika iai kabwakan rabwataia ao botaki ake a tei bukia, a riai n anganaki naba bwa a na ira buakon te waaki n tararua anne.

Kibu 34: Te Komete iaon aia Riai Aomata aika iai kabwakan rabwataia

Te Komete iaon aia Riai Aomata aika iai kabwakan rabwataia e na kateaki bwa mwangan ana Botaki te Botannaomata n te Aonnaba (UN). E kaainaki te Komete aei irouia bwakuaku aika inaomata i bon irouia. Te kibu aei ao e kateretea aron rineakia kain te Komete aei.

Kibu 35: Te Riboti mairouia Aba ake a kaina te Konwentin

Taian aba a na riboti nakon te Komete bwa e kanga aron kabutan ao wakinan mwakurian te Konwentin aei n abaia. Te moan riboti e na karaoaki inanon 2 te ririki imwin kabwaian ao kabwatan te Konwentin anne iroun te aba anne, ao imwina ai ni katoa 4 te ririki.

Kibu 36: Rinanoan taian riboti

Te Komete e na rinanoi riboti ao ni karaoi ana kukune ma ana iango ni ibuobuoki ao ni katamaroa nakoia taian aba. Taian aba ngkanne a na kaeka n angan te Komete rongorongorongo riki tabeua, ao te Komete e kona n titiraki ibukin riki taian rongorongorongo ake e tangiri mairouia.

Ngkana e rangi n iremwe ke n rimwi ni karaoan ana riboti ao e kona te Komete ni kauringia aron kakawakin karaoan te riboti irouia.

Te naan riboti a na bane ni katauraoki nakoia aaba ake tabeua ake a kukurei ni mwakuria te Konwentin aei. Te aba teuana ma teuana e katabeaki bwa e na karaoi ana riboti ao te Komete e na karaoi ana iango ni ibuobuoki ao ni katamaroa are a na bane ni katauraoki bwa a na noria aomata n te aba anne.

Te Komete e kona naba n anga riboti nakoia botaki ke mwangan nako ana Botaki te Botannaomata n te Aonnaba bwa e na buokia aaba nako n aia kanganga are a kaitibo ma ngaia ni mwakurian te Konwentin aei.

Kibu 37: Te Reitaki ni Ibuobuoki imarenaia Aba ake a kaina te Konwentin ma te Komete

Taian aba a na mwakuri ni iraorao ao ni ibuobuoki ma te Komete bwa e aonga ni kona ni karaoa raoi tabena. Te Komete e na buokia naba aaba bwa a na mwakuri ni ibuobuoki imarenaia bwa e na mwakuriaki te Konwentin.

Kibu 38: Rekereken te Komete ma botaki riki tabeua

N te aro bwa aonga ni mwakuri n reitaki taian aba ibukin mwakurian te Konwentin, ao taian botaki ake a mwatai ao mwangan nako ana Botaki te Botannaomata n te Aonnaba a kona ni kaoaki bwa a na kaitibo ao ni katauraoi taian rongorongorongo nakon te Komete iaon bwaai ake a irekereke ma kanoa ao iteran nako te Konwentin aei.

Kibu 39: Ana Riboti te Komete

Te Komete e na riboti ni katoa uoua te ririki nakon ana Maungatabu ana Botaki te Botannaomata n te Aonnaba ao te Kauntira ibukin ana Botaki te Botannaomata n te Aonnaba are tabe ma Kaubwain te Aba ao Aroaroria Aomata nako. E kona ni karaoi iango ni ibuobuoki ao ni katamaroa are boboto iaon taian riboti ao rongorongorongo ake e karekei mairouia taian aba nako.

Kibu 40: Te Kan Karin

Taian aba ake a tangiria ni kaina te Konwentin a riai n reitaki ma te Tia Koroboki ni Kabuta n ana Botaki te Botannaomata n te Aonnaba. Beeba ake a kainnаноaki bwa a na kanoaki irouia aba ake a kan rin, n aron taian booma ibukin te nano ni kan Karin, riboti ao tabeua riki, a riai ni kanakoaki nakon te Tia Koroboki ni Kabuta n ana Botaki te Botannaomata n te Aonnaba.

Kibu 41: Te Tiaina

Taian aba a kona n tiaina te Konwentin n ana Etekuata ana Botaki te Botannaomata n te Aonnaba are i Nuioki ni moa man 30 ni Maati 2007.

Kibu 42; Te Kariaia Kabaiana

Taian aba ake a tia n tiaina te Konwentin a kukurei ni butimwaea mwakurian te Konwentin ao ni kina ibukin kabaekia bwa ana karaoa nanona. Taian aba ake a tuai tiaina te Konwentin a kona ni butimwaea mwakurian te Konwentin ma aki kabaekia nako iai.

Kibu 43: Botaki ni Ibuobuoki n Reitaki n te naan Aono

Aikai botaki ake a kateaki ao ni iai mwakaia ni karaoi babaire ibukin te Konwentin aei ibukia kurubu n aba ake a mena inanon te aono teuana ma teuana. Botaki aikai a riai ni kabwarabwara bwa tera mwakaia ae a tia n anganaki irouia aaba ake a tei ibukia.

Inanon te Konwentin aei ao ngkana e taekinaki 'taian aba' ao a reke naba inanona taian botaki aikai.

Ngkana a botaki ke ni bowi taian aba ao ni kainnanao te kaotinano iaon bwaai tabeua, botaki ngkanne aikai a kona ni kaotinano ibukia taian aba ake a tei ibukia.

Kibu 45: Tain Moan Kabonganana ao Kabwaiiana

Te Konwentin aei e moa kabonganana ao kabwaiiana man ka-30 ni bong imwin te tai are uangaun iai aaba aika a tia ni nanoraoi ke ni kukurei bwa a na karaoana nanona ao ni mwakuria kanoana. Imwin 20 taian aba, te Konwentin e na moa kabonganana irouia aba ake a kukurei ao ni boraoi bwa na mwakuria kanoana imwin 30 te bong imwin te tai are a nanoraoi ke ni boraoi iai.

(Ngkana e a moa kabonganana te Konwentin aei ao nanona bwa e a riki bwa te tua n te aonnaba ao aaba ake a nanoraoi ke n tia ni kukurei bwa a na mwakuria a na rekenikai ngkana aki karaoa nanona.)

Kibu 46: Te Katikutiku

Taian aba a kona ni katikui tabeua kibun te Konwentin, are nanona bwa a kona n kaota nanoia bwa aki tauraai ni butimwaei kibun ke mwakoron te Konwentin aei ni kakoroa nanona ke ni mwakuria. Ma e ngae n anne ao te naan katikutiku aikai aki riai ni kaitara oin ao ana kantaninga te Konwentin.

Taian aba a kona ni manga kabonganai aia katikutiku akanne n te tai teuana ma teuana.

Kibu 47: Taian Onono

Taian aba a kona ni anga aia iango ni kan onono nakon te Konwentin aei ni kanakoi nakon te Tia Koroboki ni Kabuta n ana Botaki te Botannaomata n te Aonnaba. Te Tia Koroboki ni Kabuta e na kanakoi ngkanne iango n onono nakoia aaba ake a tia ni

kabongana te Konwentin aei ao n tuangia ngkana a kona ni bowi ni bairei taian iango ni kan onono akanne.

Taian onono akanne a na bwai ke ni bwaati ngkana uoua te katenimwakoro aaba ake a roko n te bowi ni ikotaki ma te Tia Koroboki ni Kabuta a boutoka te onono anne n aia kaotinano. Te Tia Koroboki ni Kabuta e na manga kanakoi taian onono akanne nakoia aaba ni kabane ake a tia n tiaina ao ni kina te Konwentin aei.

Onono akanne a na ti kona ni kabonganaki irouia aaba ake a butimwaei bitaki ke onono akanne, ma ti ngkana a oneaki taekan kibu aika 34, 38, 39 ke 40 (are kaineti ma taekan te Komete ao aia bowi taian aba), ao ngkanne onono ni kabane akanne a riai ni kabonganaki nakoia aaba ni kabane.

Kibu 48: Te Bubai

Te Aba teuana e kona ni bubai man kabonganani te Konwentin aei ngkana e koroboki nakon te Tia Koroboki ni Kabuta n ana Botaki te Botannaomata n te Aonnaba. Te aba anne e kona n aki kabaeaki bwa e na mwakuria kanoan te Konwentin imwin teuana te ririki man te tai are e koroboki iai nakon te Tia Koroboki ni Kabuta.

Kibu 49: Tein Korobokian te Konwentin ae kai roko te aba iai

Taekan te Konwentin e na riai ni karaoaki n tatauraoi n aekaki ni koroboki aika a kona aomata n roko iai ke ni warekia ao n ota iai.

Kibu 50: Taetaen te Konwentin aika bwai man Kinaaki

Taetae n aba aika taian Arabiki, Tiaina, Engiran, Buranti, Russia ao Tibein ngaia taetae ke koroboki aika kinaki ni kabonganaki ao ni bwai ibukin te Konwentin aei.

This translation was produced as part of the Pacific Disability Forum and Australian Human Rights Commission joint project *Building the capacity and knowledge of Disabled Persons Organisations and government representatives in the Pacific to progress disability issues*. The project was funded by AusAID.

The plain English guide to the Convention on the Rights of Persons with Disabilities, used for this translation, is available at:

[http://www.ag.gov.au/www/agd/rwpattach.nsf/VAP/\(CFD7369FCAE9B8F32F341DBE097801FF\)~o_Plain+English+guide+to+the+Conventiion.doc/\\$file/o_Plain+English+guide+to+the+Conventiion.doc](http://www.ag.gov.au/www/agd/rwpattach.nsf/VAP/(CFD7369FCAE9B8F32F341DBE097801FF)~o_Plain+English+guide+to+the+Conventiion.doc/$file/o_Plain+English+guide+to+the+Conventiion.doc)

The complete text of the Convention on the Rights of Persons with Disabilities is available at: <http://www.un.org/disabilities/convention/conventionfull.shtml>